

526  
38822

部

魁蛤 即蚌

禽部

鷄

伏翼 即蝙蝠

鼈

瑇瑁

鶩 即鴨

鶻

牡蠣

鷺

寒號蟲

真珠

鴈

海蛤

鶉

蚌

白鴿

田贏

雀

蝸

巧婦



第二十二本

本草述卷之二十九

潛江劉若金先生著 武進薛恮秉之氏校

介部

龜

惡沙參蜚蠊畏胸貼瘦銀

水龜甲

一名敗龜板

氣味甘平有毒 甄權曰無毒

時珍曰按經云中溼者有毒則不中溼者無毒

矣 下甲主治補陰陰血不足去瘀血 震亨 破癥瘕

疔瘡 本經 止血痢 震亨 五痔陰蝕溼痺四肢重弱 本經 及

血痲痺 日華子 續筋骨 震亨 補心腎 時珍 除驚恚氣心腹

痛骨中寒熱 別錄 並治女子漏下赤白小兒顛不合





本經 燒灰傅臙瘡時珍久服益氣別錄 丹溪曰敗龜板

屬金而有水陰中陽也大有補陰之功而本草

言惜哉其補陰之力而兼去瘀血續筋骨治勞倦

其能補陰者蓋龜乃陰中至陰之物稟北方之氣

而生故能補陰治陰血不足止血利治四肢無力

時珍曰龜鹿皆靈而有壽龜首常藏向腹能通

任脈故取其甲以補心補腎補血皆以養陰也鹿

鼻常反向尾能通督脈故取其角以補命門補精

補氣皆以養陽也乃物理之玄微神工之能事觀

龜甲所主諸病皆屬陰虛血弱自可心解矣 愚



按能通任脈使會督會督而後任脈通是陰中有

陽也能通督脈使會任會任然後督脈通是陽中

有陰也 希雍曰介蟲三百六十而龜為之長

金水之氣故味鹹而甘氣平氣味俱陰入足少陰

經方家多入補心藥用以得水火既濟之義而借

其氣以相通實非補心之正藥也

愚按龜能閉息其首常藏向腹使任脈常合於督

也鹿鼻常反向尾使督脈常合於任也蓋任督二

脈原同源而分龜鹿能使分者常合此其所以壽

也龜板固能補陰詎知其所補者陰氣其所以能





補陰氣者爲其陰中含陽也。觀本經主治小兒顛  
不合其不合者。由於腎氣之不足也。夫腦爲髓海  
而足太陽入絡於腦。乃督脈固附足太陽膀胱  
脈者。則其能治解顛。豈非任之合於督以爲腎氣  
者。丹溪謂爲陰中陽。亦爲能察物矣。故其破癥瘕  
破瘀血。續筋骨。益勞倦等證。皆其益陰氣之功。丹  
溪曰。陰足而血氣調和。則瘀血癥瘕自消。崩帶血  
痢自治。筋骨自健。若然是朱先生之所謂主陰血  
不足者。蓋從補陰氣中而血自足者也。

原理云。痛風證氣虛

者主方加參木龜板然則破癥瘕等種種之功。不必借陽以

行陰之滯，乃即陰而達陽之用。此所謂大能補陰者。如以純陰為補，庸可幾乎。蓋少陰腎經曰：陰中之至陰。然又曰：陰中之少陰。以此合於龜之使在常合腎者，則又曰：為陰中至陰之物。先生猶似察焉而未精者歟。

附方：抑結不散，用龜下甲酒炙五兩，側柏葉炒一兩半，香附童便浸炒一兩，為末，米糊丸。梧子大，每空心溫酒服一百丸。胎產下痢，用龜甲一枚，醋炙為末，水飲服一錢。日一。臙瘡朽臭，生龜一枚，取殼醋炙黃，更煨存性，出火氣，入輕粉、麝香、蔥湯洗淨，搽敷之。





龜肉 氣味甘酸溫無毒 主治釀酒治風痛緩

急四肢拘攣或久癱緩不收皆效

蘇恭

愚按龜板為治痛風要藥丹溪於陰火痛風必用

之蓋因其多屬血虛而血臟即風水之臟也然實

取其能益陰氣故本經云治溼痺乃陰氣不足之

溼以成痺者也若屬於感受之溼以是投治可乎

不觀其更用之治食積而肩腿痛者乎經曰陰之

所生本於五味陰之五官傷於五味夫五臟之傷

屬於味之陰矣不從陰氣之所生者以為治而漫

然謂其益血為能中的也 不同於夢哉 附方



筋骨疼痛用烏龜一個分作四脚每用一脚入天

花粉枸杞子各一錢三分雄黃五分麝香五分

花三錢水一椀煎服

龜溺

以豬鬃或粉葉刺其鼻即尿出

主治滴耳治聾

器

點舌下

治大人中風舌瘖小兒驚風不語摩胸背治龜胸

龜背

時珍

時珍曰龜尿走竅透骨故能治瘖聾及

龜背染髭髮也按岫嶼神書言龜尿磨瓷器能令

軟磨墨書石能入數分即此可推矣附方小

兒龜背以龜尿摩其胸背久久即差中風不語

烏龜尿點少許於舌下神妙





希雍曰龜甲妊婦不宜用病人虛而無熱者不宜用

修治 中粹曰按格物考云天有先春之震山  
自死之龜龜聽雷音則口中所含以蟄者便吐而  
昂首時令尙早無蟲可食多致餓死血肉腐爛滲  
入下甲此真敗龜板也又陽龜殼圓板白陰龜殼  
長板黃陰人用陽陽人用陰 時珍曰以龜甲鋸  
去四邊石上磨淨灰火炮過塗酥炙黃用亦有酒  
炙醋炙豬脂炙燒灰用者 希雍曰凡入藥須研  
極細不爾留滯腸胃能變癥瘕也

鼈

鼈甲 氣味鹹平無毒 諸本草主治益陰補氣  
除老瘡瘡母療勞瘦骨熱骨節間勞熱結實壅塞  
除心腹癥瘕堅積寒熱血瘕腰痛小兒脇下堅瘕  
勞復女勞復斑痘煩喘小兒驚癇婦人產後陰脫  
去息肉陰蝕痔核惡肉 方書主治虛勞瘡證積  
聚脚氣咳嗽血盜汗中風往來寒熱痞證咳嗽不  
得臥消癰小便不禁痔 宗奭曰經中不言治勞  
惟藥性論言治勞瘦骨熱故虛勞多用之然甚有  
據但不可過劑耳 時珍曰鼈亦龜類然功各有



所主鼈甲乃足厥陰血分之藥也鼈色青入肝故  
所主者瘧勞寒熱疰瘕驚癇經水癰腫陰瘡皆厥  
陰血分之病也水龜色黑入腎故其甲所主者陰  
虛精弱腰脚痠痿陰瘡洩痢皆少陰血分之病也  
介蟲陰類並主陰經血分之病從其類耳 希雍  
曰鼈甲其味鹹平潤下作鹹象水明矣本乎地者  
親下益陰何疑然本經甲之主治癥瘕堅積寒熱  
去息肉陰蝕痔核惡肉是本於益陰而更以鹹能  
軟堅之故歟別錄除瘧者以瘧邪爲病類病於陰  
虛之人乃爲暑所深中邪入陰分故出併於陽而

熱甚入併於陰而寒甚至元氣虛羸則邪陷而結  
 為瘧母甲能益陰除熱而消散故為治瘧之要藥  
 亦是退勞熱在骨及陰虛往來寒熱之上品血瘕  
 腰痛小兒脇下堅背陰分血病宜其悉主之矣勞  
 復女勞復為必須之藥勞瘦骨蒸非此不除產後  
 陰脫資之尤急仲景鼈甲煎丸治瘧母之要藥  
 得牛膝當歸佐以橘皮何首烏知母麥門冬治  
 久瘧同知母石膏麥門冬貝母竹葉治溫瘧熱  
 甚渴甚無肺熱病者加人參若瘧發熱甚渴甚又  
 寒甚汗多發時指甲黯狀若欲死并加桂枝有神



去桂枝治痺瘧良 得青蒿麥門冬五味子地黃  
枸杞牛膝治骨蒸勞熱甚則加銀柴胡地骨皮胡  
黃連

愚按鼈甲類言其益陰是矣第不細釋丹溪之云  
補陰而更云補氣也蓋氣有陽氣陰氣之殊先哲  
頗能言之且本於內經可証也經曰陰虛則無氣  
無氣則死蓋唯是真陰之氣有化乃有生有生卽  
有化故本經首云主治心腹癥瘕堅積寒熱卽別  
錄暨甄權日華子本草無不以溫瘧血瘕宿食冷  
塊疝癖冷瘕及破癥結爲言也至丹溪乃揭出補



陰補氣以為言。可謂探其要領矣。宗奭所  
 不言治勞。然治虛勞多用之。亦甚有據者。以是  
 合於方書之主治。良不謬也。如先哲曰。五臟雖皆  
 有勞。而心腎為多。心主血。腎主精。精竭血燥。則勞  
 生焉。即斯以思其所治之方。有用鼈甲者。如清骨  
 散。固謂其治骨蒸勞熱也。如扶羸湯。是除骨蒸勞  
 熱而兼以益精血之味也。又麥煎散。云治少男室  
 女骨蒸。黃瘦口臭。肌熱盜汗。即此參之。則此證乃  
 先哲所謂七情之為病也。先哲又云。虛勞發熱。未  
 有不由瘀血者。而瘀血味有不由內傷者。又云。凡



虛勞證大抵心下引脇俱痛蓋滯血不消新血無

以養之也故麥煎散中用鼈甲而同於乾漆以化

積者祇是故耳仲景金匱治五勞羸瘦等證有夫

血去病根已剗而後可從事於滋補之劑耳詎如

茲味卽以通壅為滋補所以謂勞瘦骨蒸非此不

除也又虛勞方中亦用大黃因此證有熱者暫用此

味折其炎上之勢而引之下行也又有清熱之味

同於歸地而復投白朮者使中土不受困而藥味

得行於經也又秦艽鼈甲散此透肌退熱在諸劑

中之一方也以上數方是皆同鼈甲而用者雖其

佐助之義各有所主而其用鼈甲以入諸味者不



外於補陰氣以爲功也。又如治瘧，按金匱問曰：瘧以月一日發，當十五日愈，設不愈，當月盡日解也。如其不差，當云何？師曰：此結爲癥瘕，名曰瘧母。治之宜鼈甲煎丸。又瘧母丸服之積消，及半而止。又諸久瘧及處暑後冬至前後瘧，及非時之間日瘧，並用瘧母丸法治之。以鼈甲爲君，又云瘧之間日發者，其氣之含深內薄於陰，陽氣獨發，陰邪內着，陰與陽爭不得出，故間日而作也。統前義而繹之，則鼈甲之治瘧，固益陰氣者也。且治瘧母尤專，所名瘧母，卽結爲癥瘕者，更可見諸本草之用鼈甲。





無不以療血癥癥塊云云爲言者固有見於茲味  
陰氣之專卽化以爲生也更治脚氣按脚氣證唯  
是陰不升而陽不降耳蓋足爲三陰所起之地然  
此卽三陽所歸之地以陰爲陽之原也如三陰有  
不足不能上而召陽之歸則三陽失所守不能下  
而和陰之滯故陰壅於下而陽逆於上此脚氣之  
病所由也如方書治脚氣有大鼈甲湯云治脚弱  
攣痺氣上及溫毒熱毒四肢痺弱非由於陰不足  
而不能升致陽失所守而不能降之故乎觀其以  
鼈甲爲君可知矣又鼈甲散及木香散皆云治脚

氣心腹脹滿。但一則云并治小便不利。一則云滯  
堅硬不消。夫脚氣而曰心腹脹滿。則由於陰不升  
以致陽不降也。其小便不利。非陽不得陰以歸而  
達於下乎。卽心腹之堅硬不消。非陰不能得陽以  
化而暢於上乎。二證雖鼈甲與諸味等分。然以和  
陰陽之升降。固與鼈甲爲同氣相求者矣。至於積  
聚之所治。按靈樞言積皆生於風雨寒暑清溼喜  
怒。喜怒不節則傷臟。臟傷則病起於陰。陰旣虛矣。  
則風雨襲陰之虛。病起於上而生積。清溼襲陰之  
虛。病起於下而生積。此經言積所由生之要領也。

故方書之用鼈甲。同諸味以治積者。如鼈甲丸之於肝積爲肥氣。乾漆丸及半夏散之於心積爲伏梁。又鼈甲丸之於脾積爲痞氣。四方雖各有不同。然總歸於入足厥陰。手少陰。足太陰之臟也。以鼈甲陰氣之專。入三陰而行其積。固有得於氣之相應者矣。又削堅丸之治五積六聚。由於氣結成塊。食積癖瘕者。雖不專藉鼈甲。然亦同乾漆三稜爲君。則積之本於陰虛而生者。其義不爽。固不能舍專於陰氣之味以奏效也。次而咳嗽血及盜汗證。如嗽血有二方。一黃芪鼈甲散。一人參黃芪散。皆



是治虛勞有客熱者。第前證其客熱爲甚而後證乃其未甚者也。甚則熱結正甄權所云骨節間勞熱結實壅塞。故加涼血散結之味。然鼈甲不分甚與不甚而皆用之。緣但屬客熱而益陰氣之味不可少也。又盜汗證二方。一麥煎散。首云營衛不調。夜多盜汗。一青蒿散。首云虛勞盜汗。是固大有別矣。况後方之勞證畢具乎。臨病者不可例視盜汗而誤投劑。然用鼈甲則一也。雖然若茲味入諸味中以療所患者。但止以上數證哉。是舉其主治尤切者。明悉其治義。俾用者推類以盡其變。而更尋

其要領耳。要領云何。總不外於補陰補氣也。卽如遺精正方。書中治其虛而無熱者。唯此一種。則凡用茲種之微義。不可想見乎。又卽女子漏下而鼈甲療之。却又用行瘀血。是豈謂其能止復能行乎。蓋此味專補陰氣。如漏下屬陰氣虛而不能固也。如瘀血亦屬陰氣虛而不能流貫於經絡也。但就女子經血一證。可以推其所治之諸證。固惟是專補陰氣。如經所謂知其要者。一言而終也。知要然後可以盡變。又寧惟是鼈甲一種乎哉。附方於左。

陰虛夢遺。不禁用九肋。

音勒。肋骨也。

鼈甲不以多少。

去裙襴淨洗過燒灰存性研爲細末每服一字用  
清酒小半盞童便小半盞陳蔥白七八寸同煎至  
七分去蔥白和滓日西時服須臾得粘臭汗爲度  
次日進粟米粥忌食他物 奔豚氣痛上冲心腹  
鼈甲醋炙三兩京三稜煨二兩桃仁去皮尖四兩  
湯浸研汁三升煎二升入末煎良久下醋一升煎  
如錫以瓶收之每空心酒服半匙 血痕癥癖甄  
權曰用鼈甲琥珀大黃等分作散酒服二錢少時  
惡血卽下若婦人小腸中血下盡卽休服也 婦  
人漏下甄權曰鼈甲醋炙研末清酒服方寸匕日



二 又用乾姜鼈甲訶黎勒皮等分爲末糊丸空心下三十九日再 婦人難產鼈甲燒存性研末酒服方寸匕立出 沙石淋痛用九肋鼈甲醋炙研末酒服方寸匕日三服石出瘡 吐血不止鼈末每服二錢食後茶下 癩痘發喘小便不利者用鼈甲二兩燈心一把水一升半煎六合分二服 凡患大小便有血者中壞也黑厭無膿者十死不

治

鼈肉 氣味甘平無毒 主治傷中益氣補不足



別錄去血熱益陰補虛蘇頌作丸服治虛勞瘵癯脚氣

時珍婦人帶下血癥腰痛日華

鼈頭 主治脫肛 附方 蝟皮散治肛門脫出

不收蝟皮磁石桂心鼈頭為細末服 伏龍肝散

治陰證脫肛伏龍肝鼈頭骨百藥煎為末紫蘇湯

溫洗清油調塗 此證前內治後外治皆用鼈頭

後云陰證者以其有陽證另用他藥也

頭血 主治塗脫肛甄權風中血脈口眼喎僻小兒

疝勞潮熱時珍時珍曰按千金方云目瞶唇動口

喎皆風入血脈急以小續命湯服之外用鼈血或



雞冠血調伏龍肝散塗之乾則再上甚妙蓋鼈血  
之性急縮走血故治口喎脫肛之病 附方

兒疳勞治潮熱往來五心煩躁盜汗咳嗽用鼈血

丸主之以黃連胡黃連各稱二兩以鼈血一盞吳

茱萸一兩同入內浸過一夜炒乾去茱萸血研末入

柴胡川芎蕪荑各一兩人參半兩使君子仁二十

個爲末煮粟米粉糊和爲丸如粟米大每用熟水

量大小日三服

合論龜鼈 希雍曰按二甲本經所主大畧相似

第二者咸至陰之物而其所入稍異鼈甲走肝益





腎以除熱龜甲通心入腎以滋陰惟鼈甲無毒可多用耳 愚按龜鼈二甲成屬至陰是矣第其用實有不同者龜能旋轉任脈以會督猶人身任脈之為用原不離乎元陽如龜之運陰以會陽是還乎真陰之元也鼈則無耳以眼聽蓋其精專肝竅即膽亦異衆而味大辛之頤所謂金木交互肝固喜辛為其從陰升陽也然與膽為表裏謂其為厥陰肝少陽膽血分之氣藥者良然是達乎真陰之用也經曰一陰為獨使先哲云任脈附足厥陰為生化之元之二語者可參龜鼈之用焉夫任脈司



人身生化之元，然不會於督，則陰非真陰而陰無以化，故龜之補陰者，為其本於真陰之元也。任司生化之元，而附於足厥陰以行其化，所以三陰之脈，唯足厥陰與督脈會於巔焉。經所謂一陰為獨使者也。故鼈之益陰者，為達其真陰之用也。知乎此，則體用動靜，大有區別，審證察脈，隨所宜以授之，庶不致槩言益陰而奏效少也。

簡誤曰：鼈甲妊娠，禁用凡陰虛胃弱、陰虛泄瀉、產後泄瀉、產後飲食不消、不思食及嘔惡等證，咸忌之。



修治 敷日凡使要綠色九肋多裙重七兩者為

上用六一泥固瓶子底待乾安甲於中以物

搯括也起若治癥塊定心藥用頭醋入瓶內大

盡三升乃去裙肋骨炙乾入用若治勞去熱藥不

用醋用童子小便煎盡一斗二升乃去裙留骨石

白搗粉以雞胓皮裹之取東流水三升盆盛閣於

盆上一宿取用力有萬倍也 時珍曰按衛生寶

鑑云凡鼈甲以煨竈灰一斗滔五升浸一夜煮令

爛如膠漆用更佳桑柴灰尤妙

牡蠣

本草述

卷之二十九 介部





出東海池澤及南海廣蜀永嘉海旁皆有之初生時假水沫傍石向日者漸結成形大如拳石四面漸長至數丈或數十丈塊礪如房房多左顧巖巖如山連絡不動房中有肉大者如馬蹄小者如指面名曰蠟黃潮來房開潮去房闔闔時納小蟲以充腹海人欲取其肉鑿房火迫得之以錐鑿房用烈火迫開方得挑取其肉諸本草主治益腎清熱固氣味鹹平微寒無毒精收瀆氣虛崩帶斂虛汗止虛熱渴除煩滿心脇下痞熱堅滿除留熱在關節營衛虛熱去來不定



利水溼化老痰軟積氣之痞消疝瘕積塊癭疾結  
 核益方書主治遺精赤白濁自汗盜汗小便數及  
 不禁消痺泄瀉瘡脇痛積聚癩癘洩血虛管中風  
 惡寒復曰牡蠣單生無偶而左顧者當屬一陽  
 故本經所主皆少陽所生病也之頤曰此溼生  
 也溼以合感斂水之融攝山之結合感成形者也  
 但魄礪連絡堅固不遷宛若山水之附贅懸疣耳  
 其啓閉候潮誠應開闔之關鍵陰陽之樞紐者味  
 鹹氣寒體於水而用於水不離水相故爾潔古  
 曰壯水之主以制陽光則渴飲不思故蛤蠣之類



能止渴也。類明曰成聊攝云牡蠣收斂浮越之  
正氣不使其正氣浮散也。又謂其益精氣蓋藏精  
者腎此味入腎其能益精氣者卽其收瀉不泄之  
功也。無已曰牡蠣之鹹以消胸膈之滿以泄水  
氣使痞者消硬者爽也。權曰病虛而多熱者宜  
同地黃甘草用之。海藏曰牡蠣入足少陰爲爽  
堅之劑以柴胡引之能去脇下硬以茶引之能消  
項上結核以大黃引之能消股間腫以地黃爲使  
能益精收瀉止小便腎經血分之藥也。述曰以  
貝母爲使能消積癖痰結同麻黃根作散斂陰汗



共杜仲煎湯固盜汗和澤瀉爲劑主髓疽日深嗜  
臥希雍曰牡蠣得海氣結成故其味鹹平氣微  
寒無毒氣薄味厚陰也降也入足少陰厥陰少陽  
經鹹屬水屬陰而潤下善除一切留熱爲病同

生地黃黃芪龍眼五味子酸棗仁麥門冬白芍藥

茯神黃檗當歸治心腎虛盜汗同黃檗五味子

地黃山茱萸枸杞子車前子沙苑蒺藜蓮鬚杜仲

治夢遺泄精加牛膝則兼治赤白濁同地黃黃

檗阿膠木耳炒黑香附白芍藥地榆麥門冬續斷

青蒿鼈甲蒲黃止婦人崩中下血及赤白帶下

牡

蠣

本草述

卷之二十九

介部

七

遺精山房



愚按牡蠣爲鹹水結成。魄然不動。固無情者也。然其漸長也。不可謂無情。其房因潮來而悉開。潮不至則合。是更在化機中無情而大有情者。雖是物亦不知其所以然也。何以故。蓋潮汐之消長。應月。月屬陰。乃木之精也。然先哲云。日者衆陽之母。陰生於陽。潮固依於月。而亦附於日。是故隨日而應月。依陰而附陽。盈於朔望。消於朏魄。虛於上下弦。息於輝朏。故潮有大小焉。卽此繹之。則牡蠣之結成也。母亦屬於潮氣。所以開合俱應於潮歟。夫潮本應陰精之月。而又假無成有。泡幻立堅。豈非得

陰氣之最厚者歟。得陰凝之厚，仍隨潮以爲開合。則其陰附於陽，陽化於陰之氣機，不宛然在茲乎。歟。先哲云：海中有魚獸，取皮而懸之，潮水至則毛皆起，蓋氣盛而類應，亦不知其所以然耳。是則無情乃更有情，如牡蠣者，亦猶是也。先哲謂入足少陰經爲腎經血分之藥，又有云：鹹屬水屬陰而潤下，善除一切留熱，似皆指其入腎益陰之功。然而未能明其所以然也。試暢言之，蓋其因潮而結者，本於陰中有陽，卽陰亦原資生於陽也。故其開合復應於潮者，雖質屬陰，與海水之諸生化者同然。

牡

蠣

本草

卷之二十一

介部

七

重刊





却有陰能召乎陽以歸陰而歸陰者是能化其陰以清陽其召陽歸陰之功卽本草所謂能收能瀉者也其化陰清陽之功卽本草所謂能稟堅消積清熱除溼者也蓋其能召陽以歸陰故陰得陽以化能化陰以宅陽故陽由陰而清閱方書諸證主治如病於陽虛投以益陽之味或兼以除溼卽以茲味之召陽而歸陰者使陰化於陽如病於陽實投以清陽之味或兼以滋陰卽以茲味之化陰而清陽者使陽宅於陰在陽虛之治若遺精之桂枝龍骨牡蠣湯玉華白丹內固丸又如赤濁之王瓜

牡

蠣

本草述

卷之二十一

介部

六

靈寶山房

散龍骨湯大茴香丸固精丸子午丸又如小便不  
 禁之菟絲子散阿膠飲澤瀉散桑螵蛸散小便數  
 之菟絲子散瀉泄之五味子丸又如白汗之牡蠣  
 散盜汗之柏子仁散皆因陽虛而陰召之者在  
 陽實之治若洩血之牡蠣散癩證之金匱風引湯  
 消癰之天門冬丸皆因陽實而陰化之者也又如  
 宜補陽而陰亦虛者則補陽又恐其益燥若虛勞  
 之豬脂丸卽以其化陰者而歸陽又如宜補陰而  
 陽亦虛者則補陰轉慮其滋滯若惡寒之巴戟丸  
 卽以其召陽者而化陰若是之變化主治卽二方



可以類推也。蓋人之生也，本於天一之水。陰陽固  
爲互根而潮，具有依陰附陽之氣化。此味秉其氣  
化以爲人身氣化之治，卽以療其水液痰血。其根  
陰而和陽，卽之頤不離水相之義也。乃粗者於收  
瀦則止以固脫言之，於開結則止以軟堅言之，詎  
知其能收瀦者固名陽歸陰之功，能軟堅者乃化  
陰清陽之功。是歷觀方書主治，多有益陽之虛，以  
是名之歸陰而爲益陰地者，卽止言益陰尙未悉  
其所以然也。况遺其主能而言其近似，果爲察物  
者歟。試以本草所云益腎治男子虛勞及除留熱



在關節營衛虛熱去來不定則知茲味潤下為功

固超於海水之諸所凝結又即以收瀦與英堅破

結者相對以參其不相謀之功則亦知茲味之旨

陽歸陰化陰清陽乃其所以超於海水之諸凝結

者也可僅以固脫軟堅之說為的然之義乎哉

附方並論 牡蠣地黄丸生地黃三兩牡蠣一兩

燒存 天門冬二兩半人參一兩半當歸二兩半童便

浸一宿燒 車前子三兩括蕒一兩為細末生薑自然汁

糊丸梧子大每空心服五十丸如足腫炒葶藶

湯下 如脇下滿鹽薑湯下如潮熱小便赤梔

牡

蠣



豉湯下 如腹痛芍藥甘草湯間服 如飲食少  
無味人參湯下 論曰火多水少亡精血損之源  
火少水多陽竭停液之本精遇水衰者熱退而愈  
精衰熱盛者脇滿而痛經云尺內兩傍以候脇尺  
外以候腎注云脇之上腎之分脇之內腹之分若  
脾胃得積溼塞其水路肝臟不足無血漬其腎熱  
也又曰仗穀氣以生精托鹹寒以追熱若服此味  
養命延年 愚按此王海藏醫壘元戎方也方書  
於補陽虛而投此味者頗多其入此於補陰劑而  
茲方固不數數見也據其立論主治在滋陰追熱

是矣。然有行溼之義存焉。即同於車前可見矣。所云脾胃積溼，塞其水路，肝臟血少，以漬腎臟，故熱也。味此數語，是溼之為病，不徒病陽，亦能病陰。然則此味益精，不徒以純陰為功，蓋有妙於化陰者矣。增損理中丸治結胸，服大小陷胸湯不效，宜此丸。乾薑炮半兩，人參、括蕒、甘草、牡蠣各三兩。枳實炒二十四個，黃芩去皮一兩，白朮二兩，為細末。煉蜜丸，彈子大，白湯半盞煎服，不歇，復與之，不過五六胸中豁然矣。本方渴加瓜蕒根，不渴者除之。汗者加牡蠣，不汗者勿用。愚按結胸而大小





陷胸湯丸不效者，緣下傷其胃氣，致胃氣不能任驅邪之劑，而邪熱仍結也。故增損理中湯，用參、朮、乾薑理中，而以牡蠣、栝蒌、黃芩導邪下行，固以潤下者導之。然胃之三脘皆在任脈，牡蠣補腎中之陰氣者也。用此於理中內，則陽得至陰以召之，而歸元矣。虛勞之豬膽丸，可與此相參也。小便淋閉，服血藥不效者，用牡蠣粉、黃檗炒等分爲末，每服一錢，小茴香湯下取效。小便數多，牡蠣五兩，燒灰，小便三升，煎二升，分三服，神效。愚按淋閉者，用黃檗同牡蠣以滋陰除熱是矣。至小便數多，

却止用此味。但同小便煎。此可見有召陽歸陰之義。特借小便以調水化而出之原也。是猶可以陰論乎。至如治大病後水氣。仲景有牡蠣澤瀉散。百合病渴不瘥者。仲景以牡蠣栝蒌根主之。同一牡蠣也。引以益水之原。與更以導水之壅者。何其迥殊。而此味皆奏功也。其熟思之。

希雍曰。凡病虛而多熱者。宜用虛而有寒者。忌之。腎虛無火。精寒自出者。非宜。愚按據繆氏所謂虛而多寒者。忌之。其義近似。而實不中肯也。蓋方書主治虛寒諸證。用補陽之劑而投。茲味者不少。

矣。何虛寒之宜忌耶。就如遺精一證。有冷補瀆者。有熱補瀆者。皆入牡蠣。而用於冷補瀆者。且差少焉。不可以思其名陽歸陰。是尤爲療虛寒者之所先乎。試以取左顧之義合參。則其義當不爽矣。至於虛而多熱者。宜用固確論也。

修治 取殼以頂向北。腹向南。視之口斜向東者。爲左顧尖頭大者。勝先用鹽水煮。一時後入火煨紅研粉用。大抵天左旋。而日月亦因之左旋。前哲論辨甚晰。潮依月附日者也。故牡蠣之因潮而結者。亦左顧也。



附潮依月附日義朔則日月相會望則日月明

對故潮勢大月弦之際日月不相會相對故潮

小月賦有朏音朏挑朏音挑斐朏音斐晦而月見西方謂之

朏疾行貌朔而月見東方謂之朏行遲貌其曰輝朏者

舉朔後月將漸圓之義故曰息於輝朏朏月未成

明也魄月始生魄然也蓋朔後則明漸生望後則

魄漸生故曰消於朏魄沈括曰月本無光猶一

銀丸日曜之乃光光之初生日在其旁故光側而

所見纔如鈎日漸遠則斜照而光稍滿大抵如一

彊丸以粉塗其半側視之則粉處如鈎對視之則

牡 螭

本草述 卷之二十九 介部



正圓也。或問上弦下弦之義。邵康節先生曰。上弦是月盈及一半。如弓之上弦。下弦是月虧及半。如弓之下弦。

### 真珠

禹貢淮沔蠙珠。後世乃出南北海川。蜀西路女。瓜河北澹滌江南湖。洎間亦時有之。珠池廣東廉州。珠池者四曰楊梅曰青鶯曰平江曰永安。出雷州者一曰樂明。實皆海而島嶼環圍。故稱池云。後漢書云。珠蚌中陰精也。陸佃曰。牡蠣蛤蚌無陰陽。牝牡須雀蛤以化。故蚌之久者能生珠焉。專一



於陰也管子云珠者陰之陽也故勝火王者陽之

陰也故勝水其化若神埤雅曰鼈孕乳以夏蚌孕

乳以秋聞雷聲則瘕其孕珠若懷妊然故謂之珠

胎中秋無月則蚌無胎左思賦云蚌蛤珠胎與月

盈虧是矣又淮南子所謂日至而麋角解月死而

螺蚌鰓音焦也

氣味鹹甘寒無毒諸本草主治清心安魂魄明

目去膚醫障膜除小兒驚熱解痘疔毒主難產下

死胎胞衣方書主治中風熱痺驚內外障目昏

目淚時珍曰真珠入厥陰肝經故能安魂定魄

本草述 卷之二十九 介部





明目治聾之頤曰中秋月滿海蚌食其光而孕  
珠蓋月各有望唯中秋主維四氣之樞鍵處三  
之正中交兩弦之噓噉烹金水之華藏時也食其  
光而柔麗乎中者此以坎填離神丹金液耳是其  
神室根身因形而易點餌塗塞咸歸化成後數  
語指別錄所去塗面及手足云云也希雍曰珠  
稟大陰之精氣而結故中秋無月則蚌無胎其體  
光明其性堅硬味甘微鹹氣寒無毒入手少陰足  
厥陰經心虛有熱則神氣浮越肝虛有熱則目生  
膚腎障膜除二經之熱故能鎮心去目中障腎也

同丹砂牛黃犀角天竺黃茯神遠志鈎藤鈎琥

珀金箔治小兒驚癇風熱大人失志癩狂等證

同爐甘石龍腦香白礪砂空青人爪點目能去翳

障 同鐘乳石象牙末牛黃冰片白殭蠶紅鉛天

靈蓋蛀竹屑樺皮灰沒藥明礬治廣瘡結毒及陰

蝕瘡有奇效 同人中白黃檗青黛鵬砂和冰片

少許治口疳加入雞內金膩粉治下疳

愚按蚌之產珠陸佃言其專一於陰者似是矣第

蛤蚌珠胎與月盈虧而詎知月之盈虧又係於日

是先哲所謂月本無光日耀之乃光也然則淮南



月死而螺蚌騰之說豈非指陰不得陽之故歟其  
食月之光而後孕珠者又豈非陰必藉於陽之義  
歟是珠誠爲陰中之陽有如管子所云矣本至陰  
之精乃分至陽之光麗至陽之光乃凝至陰之質  
然則如方書主治諸證豈徒取其純陰如草木中  
苦寒之味哉卽療中風之活命金丹又療中風之  
至聖保命金丹及熱痺之石楠散投此於諸隊中  
固有轉陽入陰而神其清化者也卽治驚者率以  
爲鎮怯不觀方書真珠母丸其主治者乃因肝虛  
而內受風邪臥則寬散不收有似驚悸然此味固



逐隊以益肝者也。又如目眚諸方，率以為其質堅，  
 凝能去腎障，是固然矣。然在目昏之真珠煎，云治  
 肝虛寒，目茫茫不見物者。又目風淚出，有真珠散。  
 云因於肝虛者，細推諸治之益肝虛，不有由陰育  
 陽，即由陽暢陰，有合於厥陰之肝，屬陰中之少陽  
 乎。至謂其鎮怯磨腎，實藉此品為之先，為之  
 樞，似不以鎮怯磨腎為其能事也。且諸治多有并  
 及風者。瀕湖謂入厥陰肝經，良不謬矣。如之頤所  
 云中秋月滿，海蚌食其光而孕珠，謂中秋為烹金  
 水之華藏時也。此義與入肝之諸治相合，蓋唯金



能合水火之氣。俾陰陽交媾。如明珠之胎。因於烹  
金水之華。以媾陰陽之精。非所謂有木始之。更得  
金終之。乃爲金木之交媾。而大益肝臟乎。是猶得  
謂之純陰乎。試思療肝虛寒而目昏者。豈得用純  
陰之味以相對待乎。或曰。然則於清熱無當耶。曰。  
固謂其得陰陽呼吸之元。隨證而因其主輔以濟  
之。有妙於其先者矣。附方。婦人難產。真珠末  
一兩。酒服立出。胞衣不下。真珠一兩。研末。苦酒  
服。子死腹中。真珠末二兩。酒服立出。和煎云云。  
時珍曰。凡入藥不用首飾。及見尸氣者。珣曰。研如

粉方堪服食不細則傷人臟腑  
修治 用豆腐一塊入珠於腐腹煮一炷香取出  
將洗淨無漿白棉布二三重包珠於石上杵爛為  
細末

海蛤

時珍曰海蛤者海中諸蛤爛殼之總稱不專一蛤

也又有所謂文蛤者或另是一種陳藏器謂即為  
未爛時殼恐猶未穩但海中蛤蚌名色雖殊性味  
相類功用亦同無甚分別也

氣味苦鹹平無毒 普曰神農苦岐伯甘扁鵲鹹





主治咳逆上氣喘息煩滿胸痛寒熱療十二水  
滿急痛并水氣浮腫止消渴潤五臟利膀胱大小  
腸療痰飲胸脇脹急腰痛及傷寒血結項下瘤瘰  
五痔疝證婦人血結胸並崩中帶下 別錄曰療  
陰痿

愚按海蛤之用在《本經》謂其治咳逆上氣喘息煩  
滿胸痛寒熱蓋所主治固治陰氣虛而上逆者也  
夫腎乃氣之元氣陽也出於陰中內經曰陰者陽  
之守也陰不能為陽之守故有種種如上諸證即  
別錄謂其療陰痿則知其歸陽於陰矣然唐本草

又謂其主十二水滿急痛並甄權治水治浮腫者云何在內經曰腎者牝藏也地氣上者屬於腎而生水液也又曰出地者陰中之陽陽予之正陰爲之主若然但病於陰之不爲陽守而陽乃上逆則至陰之生水液者不得陽以爲正亦卽隨陽汎濫四出矣雖然在本經已包舉而言之如內經曰陽明所謂上喘而爲水者陰氣下而復上上則邪客於藏府間故爲水也所謂胸痛少氣者水氣在藏府也水者陰氣也陰氣在中故胸痛少氣也卽此叅之在本經所主治不已悉其未言之證乎抑已



既病於水而蕭炳何以又謂其止消渴潤五臟也  
曰內經明言其邪客於藏府矣是真陰實大損也  
茲味之治固導邪水而益真陰以還其生水液之  
原也真陰益則陽不孤行而消渴除五臟潤矣陽  
不孤行卽附於陰故在下焦之膀胱及大小腸所  
謂氣化斯出者先受其益以其開竅於二陰之故  
也且并陰之已成血者陰得陽化而亦不病於孤  
行如傷寒血結之類是也推而療痰飲及胸膈脹  
急爲水液之所結更血之所結如癭瘤類何莫非  
此不孤行之陰陽以奏功乎至於婦人崩中帶下



固亦以其陽不孤行者守之。婦人血結並以其陰不孤行者化之矣。或曰茲物以其鹹也。如鹹味固侈。何獨如是之功。乃在茲歟。曰海鹹之異於河淡者。明明猶之人身水臟也。而其氣所生化之物如茲。種無情而有情。更與人身之氣化相感。先聖取之以療。如上諸證。豈苟然哉。雖然。取鮮蛤而用之。唯濱海諸郡易耳。卽療水腫證。亦多有取蛤殼煨成粉者。臨證從其權宜可也。愚按水之原在腎。然水之主在土。治斯證者。固宜參酌於胃腎以投劑矣。然如斯味為補腎歸陽要藥。乃方書治水



證用之亦寥寥也。何哉。附方。石水肢瘦其腹

獨大者海蛤丸主之。海蛤煨粉防已各七錢半。葶

藶赤茯苓桑白皮各一兩。陳橘皮郁李仁各半。兩

為末。蜜丸如梧子大。每米飲下五十九丸。日二次。

傷寒血結胸脹痛不可近。仲景無方。宜海蛤散主

之。并刺期門穴。用海蛤滑石甘草各一兩。芒硝半

兩。為末。每服二錢。雞子清調服。更服桂枝紅花湯

發其汗。則愈。蓋膈中血聚。則小腸壅。小腸壅。則血

不行。服此。則小腸通。則血流行。而胸膈利矣。

海蛤粉

近世以蛤蜊殼火煨成粉。曰蛤蜊粉。蛤蜊即閩浙人以作醬者是。

時珍



曰海蛤粉者海中諸蛤之粉以別江湖之蛤粉

粉也今人治稱但曰海粉蛤粉寇氏所謂衆

灰是矣近世獨取蛤蜊粉入藥然貨者亦多

也大抵海中蚌蛤蚶蠣性味鹹寒不甚相遠功能

軟散小異大同非若江湖蚌蛤無鹹水浸漬但能

清熱利溼而已今藥肆有一種狀如線粉者謂之

海粉得水則易爛蓋後人因名售物也然出海中

沙石間故功亦能化痰軟堅氣味鹹寒無毒

誤者

主治喘息嗽逆化痰飲解結氣軟堅積愈心

脾疼痛消水腫利小便止遺精白濁療癩疝消瘰





核散腫毒治婦人血病油調塗湯火傷 丹溪曰

海蛤粉治肺燥鬱脹咳喘熱痰能降溼痰能燥塊

痰能軟頑痰能消治疝氣白濁帶下同香附末薑

汁調服主心痛 時珍曰寒制火而鹹潤下故能

降焉寒散熱而鹹走血故能消焉堅者軟之以鹹

取其屬水而性潤也溼者燥之以滲取其經火化

而利小便也。此語謬甚 好古曰蛤粉乃腎經血分之

藥故主溼嗽腎滑之疾。海蛤粉為腎經血分之藥誠如海藏所云然則此味

治溼痰為要藥以腎主水液而痰為水液所化病於溼者更切也

愚按蛤粉之用其所主治不一而足然都不究其



有合於人身元陰之氣更不究其能於陰中歸陽  
 故丹溪之所謂能降能消能奠能燥者槩以爲其  
 義在寒則降鹹則奠耳試問消且燥者當屬何說  
 哉卽時珍亦強作解耳夫本經於海蛤其氣味屬  
 鹹平矣而其殼用火煨者反得鹹寒乎夫元陰之  
 氣非偏於寒者也陰中有陽故此味陰氣之所至  
 而陽之浮者自還其宅如喘息嗽逆之類是曰降  
 也由真陰得歸則陽亦歸於陰凡陰邪之所聚以  
 成形者自由有形而化無形如浮腫之類故曰消  
 也陰邪之所鬱者畜陽於中陽卽依陰邪以爲堅



核爲積塊。陰邪消歸無形。則陽不得畜於中。不能  
依陰以爲堅核。爲積塊。故曰奠也。陰邪漸歸消化。  
則陽卽行其化。而水溼之氣皆淨。如水腫白濁之  
類。故曰燥也。由是叅之。則可以知其主治諸證之  
故矣。如徒以爲氣寒味鹹而已。然則治嗽血。溲血。  
固不得謂鹹能軟堅矣。若但取其氣之寒乎。彼清  
熱者。其同隊不少。何得贅此。是蓋取真陰之原。爲  
陽守者。以化陽也。又如風熱邪氣上攻。以爲眩暈。  
於諸除風熱劑中。而入此味。猶得謂其以寒降熱  
乎。又如療風癩之參朮丸。人參朮砂與此同用。豈



非配真陽於真陰以化陽狂之邪乎。至消瘴化水  
 丹以此味為君。治兩少陰之渴。是取真陰之氣化  
 明矣。又療滯下之裏急後重者。此味與穿山甲同  
 用。是取元陰之化氣以暢大腸之收氣。蓋腎陰原  
 主二便。不獨膀胱也。遺精二方。一取其補陰。同於  
 黃檗。名珍珠粉丸。一取其能補陰中之陽。同平補  
 元陽諸味。乃以為君。是更可參也。猶不止於益陰  
 况可徒謂其寒能除熱乎。但就數證推之。可以妙  
 用矣。蓋凡治熱。可以寒直折者。在實熱。宜然。如虛  
 熱鬱熱。不若從真陰以化陽之為得。尤不若從陰



中有陽者以歸失守之陽爲得也。如執寒鹹二字以爲功，卽用治痰，尙未得其肯綮。况投於他證，不佞佺然不知其所由來乎。至清熱除淫，似是而非，恐庸工執此四字投劑，大有錯誤。癡人前豈可說夢耶。

附方 氣虛水腫 昔滁州酒庫攢司陳通患水腫垂死，諸醫不治。一姬令以大蒜十個搗如泥，入蛤粉丸梧子大，每食前白湯下二十九丸，服盡小便下數桶而愈。

心氣疼痛 真蛤粉炒過白佐以香附末等分白湯淬服。

白濁遺精 潔古云陽盛陰虛故精泄也。真珠粉丸主之用蛤粉煨一

斤黃柏新瓦炒過一斤為細末白朮丸如梧子大

每服一百丸空心用溫酒下日二次蛤粉味

且能補腎陰黃柏苦而降心火也 玉粉散

蛤為細末每服二錢蜜水調服治血痢解臟腑積

熱毒 卽此觀之則此類亦同氣於人身腎陰之

清化故能解臟腑之積熱乃知此義者殊少也

希雍曰蛤粉善消痰積血塊然脾胃虛寒者宜少

用或加益脾胃藥同用為宜

治修 丹溪曰蛤粉用蛤蜊殼燒煨成粉不入煎

劑 時珍曰按吳球云凡用蛤粉取紫口蛤蜊殼





炭火煨成以熟栝樓連子同搗和成團風乾用最妙 愚按治痰之燥者可如吳球之治其餘痰治則不必然至療他證更宜專用 時珍曰汪機

以海中浮石名海石者謂卽蛤粉殊大誤也今正之

文蛤 時珍曰按沈存中筆談云文蛤卽今吳人所食花蛤也其形一頭小一頭大蛤有花斑的便是 先哲有云卽海蛤粉河間丹溪多用之 氣味鹹平無毒 主治咳逆胸痺腰痛脇急利小便止煩渴化痰軟堅療口鼻中蝕瘡鼠瘻大孔出血

女人崩漏 附方 仲景方傷寒在陽當以汗解

反以冷水啜之或灌之其熱被鬱却不得去更益

煩熱皮上粟起欲飲水反不渴者文蛤散主之

文蛤五兩為末每服方寸匕沸湯下甚效 希雍曰

文蛤之鹹能消散上下結氣故別錄主治胸痺腰

痛脇急又謂治鼠瘦大孔出血崩漏皆血熱為病

鹹平入血除熱故並主之

愚按張仲景先生治傷寒在陽明未入府者固宜

汗解乃有因其煩燥誤以水啜及灌之遂使寒轉

鬱而鬱中增熱所以更益煩熱然皮上却有粟起



此外寒鬱熱之徵。故欲飲水者。中有熱也。不渴者。非真熱。乃鬱而成也。如是證。先生乃以文蛤散主之。是爲其能開寒鬱於陽明。而使陽之結氣得散。故此證亦列之結胸例也。愚妄揣蛤粉能開鬱熱。謂其陽鬱於陰中者。藉同氣之陰。引之歸下。而所結之陽。亦逐之以散也。初意以爲創。及閱先生文蛤散之治。大獲我心矣。然則此味。又豈但如丹溪所云。能降能消。能奠能燥。而其功僅僅在一痰飲乎哉。

附案 愚於戊戌歲冬深終之氣。主氣寒水。既與司天相合。而客氣溼土。又與在泉相合。更



加於主氣寒水之上其病於陽氣甚矣氣乃肺本  
 之故肺易受寒邪既病於主氣之肺則陽氣益不  
 得施化而水中之陽化更微致溼淫滋患故溼痰  
 生聚於胃而不行是溼痰愈覆其陽則肺之鬱熱  
 遂口舌為燥而肺所治之上焦亦俱不爽且移於  
 所合之大腸而化風矣治之者宜麻黃杏仁輩以  
 散寒炒乾薑製白朮以除溼芎藭所鬱之熱驟以乾  
 薑白朮投之適益其鬱熱之勢耳愚散寒以麻黃  
 杏仁而除溼暫用二陳加南星乃入蛤粉於中以  
 歸陰潛而散陽鬱其痰漸化而熱亦行徐以乾薑



白朮枳實輩理中乃得全愈

希雍曰病屬邪熱痰結者宜之氣虛有寒者審

蚌

時珍曰蚌與蛤同類而異形長者通曰蚌圓者通

曰蛤故蚌從中蛤從合皆象形也後世混稱蛤蚌

者非也

蚌粉 氣味微鹹寒無毒 主治反胃心胸痰飲

用米飲服

藏器

解熱燥溼化痰消積止白濁帶下

時珍

時珍曰蚌粉與海蛤粉同功皆水產也治病之

要只在清熱行溼而已日華子言其治疳近有一



用大田螺七枚洗淨新汲水養去泥穢換水一升  
浸洗取起於淨器中着少鹽花於甲內承取自然  
汁點目逐個用了放去之 大腸脫肛脫下  
寸者用大田螺二三枚將井水養三四日去泥用  
雞爪黃連研細末入麝內待化成水以濃茶洗淨  
肛門將雞翎蘸掃之以軟帛托上自然不再復發  
也 痔漏疼痛用田螺一個入片腦一分在內取  
水搽之仍先以冬瓜湯洗淨 宜用 申  
希雍曰目病非關風熱者不宜用 申  
殼氣味甘平無毒 附方 心脾痛不止者水





甲散主之用田螺殼以松柴片層層疊上燒過火  
吹去松灰取殼研末以烏沉湯寬中散之類調服  
二錢不傳之炒小兒驚風有痰遠年自田螺殼  
燒灰入麝香少許水調灌之此乃田螺白殼者  
與白殼蝸蠃有別反胃吐食用田螺殼并黃蛻  
殼皆取久在泥中者各等分炒成白灰每二兩入  
白梅肉四個搗和爲丸再入砂合子內蓋定泥固  
煨存性研細末每服二錢用人參縮砂湯調下不  
然用陳米飲調服亦可凡覺心腹脹痛將發反胃  
卽以此藥治之愚按田螺殼曰甘平而蛻殼曰

鹹温蚌殼粉又曰鹹寒然則功用彷彿而不無少

殊用者宜審病因如槩以為無別何以治反胃者

田螺殼與蜆殼並用而不止用其一哉蜆音顯小蛤也

溪湖中漁家類食之

蝸即螺蝸處處溪湖有之大如指頭而殼厚於田螺後所列白螺蝸殼又非溪湖中所生者也

白螺蝸殼或屋上墻上壁氣味甘寒 主治痰

飲積及胃脘痛震亨反胃膈氣痰嗽時珍附方 溼

痰心痛白螺蝸殼洗淨燒存性研末酒服方寸匕

立止 膈氣疼痛白玉散用壁上陳白螺蝸燒研

每服一錢酒下甚效 痘瘡不收墻上白螺蝸殼

本草述 卷之二十九 介部



洗淨煨研摻之

愚按田螺之性味繆氏謂其產於水田中稟水之陰氣故其汁大寒不知產於泥水中如蚌蛤蜆蠃諸物寧有異乎而此味功用似有殊者謂何時珍曰螺蚌屬其殼旋文其肉視月盈虧故王充云月毀於天螺消於淵夫月乃水之精故海潮與月相應而茲物又應於月卽此論之則其物雖小或亦乘至陰之精氣而化生歟故蚌蛤螺蜆之肉皆謂其清熱行溼而細繹此味所用如開禁口痢等病皆搗爛和他藥貼臍之上下夫臍固兩腎所夾



兒病疳專食此粉不復他食亦一異也 附方

反胃吐食用真正蚌粉每服稱過二錢搗生薑汁

一盞再入米醋同調送下 痰飲咳嗽用真蚌粉

新瓦炒紅入青黛少許用淡薑水滴麻油數點調

服二錢 此方卽宋徽宗時李防禦得之軍卒者

防禦爲內醫官時有寵妃病痰嗽終夕不寐面浮

如盤徽宗呼李治之令供狀三日不效當誅李憂

惶技窮忽聞外叫賣咳嗽藥言服此卽得睡李市

二貼自服之無他乃取三貼爲一進妃服之是夕

嗽止比曉面消上甚喜賜金帛無算李恐索方尋



前賣藥人以厚價求之而得積聚痰涎結於胸膈之間心腹疼痛日夜不止或乾嘔噦食者炒粉丸主之用蚌粉一兩以巴豆七粒同炒赤去豆不用醋和粉丸梧子大每服二十九薑酒下丈夫臍腹痛茴香湯下女人血氣痛童便和酒下愚按蚌不分湖海俱應月而胎珠夫月乃至陰之精然借光於日是則至陰之中固有至陽也應氣以生者蚌謂其殼粉不因至陰之氣以清熱而陰中有陽者以利溼乎時珍云江湖蚌粉與海蛤粉同功但無鹹水浸漬止能清熱利溼而已雖然蚌

殼粉亦有微鹹。以俱原於水也。第其收陰歸陽之功。實不及海粉。投劑宜酌之。

### 田羸

前蛤蚌海產。與江湖所產。但少有異耳。田羸。指水田及湖濱之羸。其用殊迴於海羸。未可例視也。

肉 氣味甘大寒無毒 主治去腹中結熱利溼

熱搗爛貼臍間。引熱下行。開禁口痢。並治小便不通。小腹急硬。及水氣浮腫。取其汁治下消渴。肝熱目赤。大腸脫肛。痔漏疼痛。及黃疸。希雍曰。田螺產於水田中。稟水土之陰氣。故其汁大寒。味應甘。





性無毒解一切有餘之熱 附方 禁口痢疾用

大田螺二枚搗爛入麝香三分作餅烘熱貼臍間

半日熱氣下行卽思食矣甚效 小便不通腹脹

如鼓用田螺一枚鹽半匕生搗傅臍下一寸三分

卽通 水氣浮腫用大田螺大蒜車前子等分搗

膏攤貼臍上水從便旋而下 消渴飲水日夜不

止小便數者用糯米二升煮稀粥一斗冷定入田

中活螺三升在內待食粥盡吐沫出乃收飲之立

效 消渴而小便數者乃下消也唯治此而不槩

治上中則其化於至陰之氣也可思 肝熱目赤

爲至陰之所居也。豈非取乘至陰之化者卽用之  
以化陰中之氣。更能開陽之結歟。况取其自然  
以瘳疾者。在蚌蛤蜆蠃。未可等也。烏得槩以  
之陰論哉。至蚌蛤蜆之殼。與田螺大同小異。固皆  
言其治心胸痰飲。及痰熱反胃之證矣。唯朱丹溪  
先生所用白螺殼。乃不生於泥水中。而陳朽粘於  
或屋或墻者。是又少異。蓋其不生於泥水中。感地  
中陰溼之氣以生。乃上升於屋墻。或又乘於他氣  
之化。諸殼皆取其金氣以破痰結。而此殼色白。更  
得金氣之專矣。以溼土始。而以燥金終。先生言其

治痰飲積及胃脘痛。豈非其的對乎。夫痰飲皆因溼化而畜其正氣者也。第此味似止治溼痰之結者。不比於蛤蚌田螺之殼。能開溼熱之痰也。姑揣其理如是。用者察之。

魁蛤 一名魁陸 蚶 瓦壘子

時珍曰郭璞爾雅註云魁陸卽今之蚶狀如小蛤而圓厚臨海異物志云蚶之大者徑四寸背上溝文似瓦屋之壘肉味極佳浙東種於近海田謂之蚶田

肉 氣味甘平無毒 鼎曰寒 炳曰溫 希雍





曰蚶得水中之陽氣故其味甘氣溫性亦無毒今人糟其肉爲侑酒之物鮮有入藥者

殼氣味甘鹹平無毒 主治消血塊化痰積

燒過醋焯醋丸服治一切血氣冷氣癥癖

肉燒存性研傅小兒走馬牙疳有效

愚按時珍言其鹹走血而爽堅故能消血塊散痰

積但蚶之肉甚甘甘能和血殼甘而兼以鹹平其

效當更甚於諸鹹味乎

修治 凡用取陳久者炭火煨赤米醋淬三度出

火毒研粉

本草述 卷之二十九 介部



瑇瑁 一名玳瑁音代昧

甲 氣味甘寒無毒 宗奭曰入藥用生者性味  
全也既經湯火卽不堪用與生熟犀義同 主治  
解嶺南百藥毒 希雍曰瑇瑁龜類也得水中至  
陰之氣故氣寒無毒而解一切熱毒其性最靈凡  
遇飲食有毒則必自搖動然須用生者乃靈死者  
則不能矣嶺南人善以諸毒藥造成蠱人中之則  
昏憤悶亂九竅流血而死惟用活瑇瑁刺其血飲  
或生者磨濃汁服之可解日華子主破癥結消癰  
腫止驚癇陳士良主心風解煩熱行氣血利大小

毒瑁  
瑁  
腸以其性稟純陰氣味至寒故治如是等病也又能解痘毒神效 附方 預解痘毒遇行時服此未發內消已發稀少用生玳瑁生犀角各磨汁合和勻溫服半合日三服最良 痘瘡黑陷乃心熱血凝也用生玳瑁生犀角同磨汁一合入豬心血少許紫草湯五匙和勻溫服

愚按是物誠爲良藥但療病唯用生者生者難得在邊海之地容或有之而遠海諸郡絕不能獲生者猶之不得其用也故未及詳論

希雍曰痘瘡虛寒不起發者不宜服



... 宜... 宜... 宜...

... 宜... 宜... 宜...

... 宜... 宜... 宜...

... 宜... 宜... 宜...

... 宜... 宜... 宜...

... 宜... 宜... 宜...

... 宜... 宜... 宜...

... 宜... 宜... 宜...

... 宜... 宜... 宜...

... 宜... 宜... 宜...

本草述卷之二十九終



北京中医药大学图书馆版权所有

本草述卷之三十

潛江劉若金先生著

武進薛恮秉之氏校

禽部

雞

愚按雞雖禽類一種。在朱丹溪先生以爲屬土而有金木火。又屬巽。能助肝火。且曰雞性補能助溼中之火。數語於此種殊有當也。迺李瀕湖非之云。雞專屬風木。易於動風。一似無所取云爾。是豈爲能察物理哉。請更悉之。夫雞性能補。不獨丹溪言之。在先哲亦類言之。如純屬風木。則何利益之有。



而槩云補也。且一種而毛羽有各具一色者。豈非  
中土得兼四氣。乃隨其偶合之一以賦形乎。是雞  
固與木。必不能離土以生育。豈為專稟風木者乎。  
夏先哲有云。雞在卦屬巽。在星應昴。兌見而巽伏。  
合而繹之。是巽木之屬。固為土之主。而效金之用  
者也。何以明其效用於金。試觀星應於昴者。每於  
丑寅司晨。則巽之伏於兌。有可思也。兌見巽伏出  
易雜傳丑寅  
司晨者由金而木是  
金為木主之義也夫人身臟腑之病。由脾胃之  
行氣於三陰三陽者。或苦於土不得木之主。更或  
患於木之不為金用耳。如土得木主而木為金用。



則中土運化之氣無不宣暢而盈溢似此謂其補  
 虛羸可也豈能責於專屬風木之物乎哉試觀方  
 書中唯雞之肫名雞臄脰及肫內黃皮呼為雞內  
 金者是固雞臟也方書用之叅其對治諸證亦似  
 取其為中土之臟乃得木為土主而木隨為金用  
 者以至土而益腎豈得力於單行之風木哉即此  
 可以推求全雞之用矣是丹溪屬土而有金木火  
 之說良不謬即能助溼中之火一語亦槩同魚肉  
 之類為言耳頌曰雞肉雖有小毒而補虛羸是  
 要故食治方多用之吳琳云三年癩雞常食治



虛損養血補氣

黑雌雞肉

氣味甘酸溫平無毒

主治男女因

積虛或大病後虛損沉困酸疼盜汗少氣喘悒或

小腹拘急心悸胃弱多臥少起漸至瘦削若年深

五臟氣竭則難治也用烏雌雞一頭治如食法以

生地黃一斤切飴糖一升納腹內縛定銅器貯於

甑中蒸五升米熟取出食肉飲汁勿用鹽一月一

作神效 時珍曰烏雞屬水牝象屬陰故烏雞所

治皆血分之病各從其類也

黃雌雞肉

氣味甘酸鹹平無毒

附方

消渴



飲水小便數以黃雌雞煮汁冷飲并作羹食肉

脾虛滑痢用黃雌雞一隻炙以鹽醋塗煮熟食之

產後虛羸黃雌雞一隻去毛背上開破入雀白

合三枚白粳米半升縫合入五味汁中煮熟開腹

取百合并飯和汁作羹食之并食肉

愚按雞有丹白黃烏所謂屬土而偶合五行之一

以賦形也然要取烏色與黃色之雌者蓋雞所稟

於木火氣較勝故以水土賦形而歸其氣於水土

更屬於雌之陰者以為補益庶幾其能奏功也若

烏骨雞固是另一種耳





本草通串卷之三十一  
鳥骨雞肉 氣味甘平無毒 主治補虛勞羸弱

治女子崩中帶下 一切虛損諸病 時珍曰烏

骨雞有白毛烏骨者黑毛烏骨者斑毛烏骨者有

骨內俱烏者肉白骨烏者但觀雞舌黑者則骨內

俱烏入藥更良雞屬木而骨反烏者巽變坎也受

水木之精氣故肝腎血分之病宜用之男用雌女

用雄婦人方科有烏雞丸治婦人百病煮雞至爛

和藥或并骨研用之 希雍曰雞雖有丹白黃烏

總之性溫補陽起陰兼有風火之義惟烏骨者別

是一種獨得水木之精故主陰虛發熱蓐勞崩中



等證也

愚按繆仲淳謂烏骨雞別是一種。其說良然。李嶺湖謂此種獨得水木之精。亦能探取精義矣。故不獨療女子諸疾。其稟水木之精。實爲生育之化原也。是以古方有青蒿烏雞丸以爲涼補。又小烏雞丸以爲溫行。而皆用此爲補益之主。隨用溫涼。無不可者。近代名醫亦謂前二方涼補溫行。因其所宜而投。固不能舍此種。惟大烏雞丸主方雜亂。欠妥。不足取也。又金蓮種子丸亦用烏骨雞立方。更有可思也。同前二方。俱列濟陰綱目第六門治血

虛不孕類

雞冠血 氣味鹹平無毒 時珍曰雞冠血以

年老雄雞者良取其陽氣充溢也更貴丹者又

中之陽也 丹雞者治白癩風日華子並療經絡閉

風熱塗頰治風中血脈口喎不正時珍陰毒卒痛

用雄雞冠血入熱酒中飲之暖臥取汗 高武痘

疹正宗云雞冠血和酒服發痘最佳雞屬巽屬風

頂血至清至高故也 希雍曰痘瘡須分寒熱雞

血性溫天行瘡子虛寒者得之固可資其起發倘

因血熱而乾枯焦黑者誤用之能更轉劇世人類





用雞血桑蠹蟲發痘而不分寒熱誤也

雞臍脰

辛皮癡雞臍也即雞臍男用雌女用雄

又其裏黃皮名雞

內金

氣味甘平無毒

諸本草主治洩痢小便

頻遺

別錄

止泄精及尿血崩中帶下

日華子

療大人淋

漓反胃

時珍

方書主治雞臍脰治消瘰小便數及

不禁並療遺精

雞內金亦治消瘰

愚按雞臍脰即雞臍也希雍謂即雞之脾乃消化

水穀之所若然是則亦猶人身之脾臟耳然閱方

書療消瘰若腎瀝散治消腎腎氣虛損發渴小便

數又白茯苓治消腎因消中之後胃熱入腎消

雞

冠血  
臍脰

本草

卷之三十一

禽部

五

還真山房



燥腎脂令腎枯燥遂致此疾。二方固皆用之。又天  
門冬丸治初得消中。食已如飢。手足煩熱。小便白  
濁。是方亦用之。一則專主腎氣之虛。一則由胃熱  
移入於腎以爲腎消。一則專爲中消之熱。總因茲  
證。類由熱鬱傷陰以爲病。而脾爲太陰。腎爲至陰。  
二臟之病固相因。雖分治中下之消。而亦無不宜  
也。更治小便數。有兔絲子丸。又小便不禁。用兔絲  
子散。二方大補腎氣。微有小異。俱得用之。而同於  
熱補者也。更遺精之既濟丸。但調水火之交。絕禁  
熱劑。與前治消中之天冬丸。俱得用之。而同於涼

補者也。若然，是滋味不為脾腎投劑之主乎。第補脾腎之陰，其味亦不少矣。何以獨是之取也。曰：惟雞為巽木之屬，却為土主，更為金用，以致土化而且歸於腎，乃其脾臟是獨受三陰具足之氣。雖微物而理有妙合者，取以療前證，其能舍諸更參治療諸方。小便遺失者，固治之，而小便淋瀝最痛者，亦治之，則知非以通塞為功，固以三陰具足之氣能為功也。由此繹之，則消瘴反胃並禁口痢諸證，皆可以明其治療之本矣。抑更有出於寒治熱治之外，以為功而粗者，不致審耳。然則丹溪屬土而





有金木火者。豈不信而有微哉。

雞屎白 雄雞屎乃有白臘。月收之。白雞烏骨者。

更良。素問作雞矢。氣味微寒。無毒。主治中風。

失音及白虎風。賊風風痺。破血和黑豆炒酒浸服。

之療。破傷中風及心腹鼓脹。並轉筋入腹下氣利。

小便破石淋。

愚按雞矢白之用。在後學鹵莽者。見素問以雞矢。

醴治鼓脹。遂止。謂此劑爲通利而用。却不深求前。

哲製斯劑者。有主本在通利之先。而夢夢者誤執。

標以爲論治。詎知卽素問投雞矢醴以治鼓脹。果。



雞  
矢白

祇以通利為功乎。試觀諸本草主治。或中風失音。或白虎風。或賊風。風痺。或破傷中風。用此療他風。證殊亦不少。則以雞為巽風之屬。還用治風者。義固有所取也。蓋肝屬風木。其所勝者脾之土也。其所不勝者肺之金也。所以治心腹鼓脹轉筋入腹。皆肝木侮其所勝之土。而其所不勝之金。不能為之主也。又如石淋疼痛。小水不利。則是肝木不得脾土以為用。并不得肺金以為主。還病於肝臟之血也。更如癥瘕為病。乃脾土不得肝木血臟之化。更不得肺金氣臟之化也。即如療風諸治。又豈止

本草

卷之三十一 禽部

七

景真山房



歸其責於風木哉。蓋亦本於氣血之臟。宿有不爲風木之主之用者。以致此也。統繹斯義。則木土爲用。金木互爲化者。雖雖微物而具此妙理。是其本也。其矢白乃木爲土主。更爲金用。以致脾臟轉化而出者。還爲氣血冥膏之治。是其標也。若舍其本而取其標。謂此矢白遂爲氣血轉化之權輿。有是理乎。如時珍希雍指積滯溼熱而言鼓脹。固捨其一端。而憤憤亦不少。且時珍謂專屬風木一語。不知其何以療諸證也。卽以治諸風證。未審其能得當否。然則丹溪屬土。而又有金木火更爲巽風。



雞矢白

之屬者視此鹵莽葦爲何如也抑木爲金伏即矢

用白可知就是可以說其微義矣附雞矢醴論

普濟方云治鼓脹口食不能暮食由脾虛不能制

一水水反勝土水穀不運氣不宜流故令中滿其脈

沉實而滑宜雞矢醴主之何大英云諸腹脹大皆

屬於熱精氣不得滲入膀胱別走於腑溢於皮裏

膜外故成脹滿小便短濇雞矢性寒利小便誠萬

金不傳之寶也用臘月乾雞矢白半斤袋盛以酒

醅一斗漬七日溫服三盃日三或爲末服二錢亦

可附方破傷中風腰脊反張牙緊口噤四肢

本草通串 卷之三十一 禽部 八



強直用雞矢白一升大豆五升炒黃以酒沃之微  
烹令豆澄下隨量飲取汗避風 角弓反張四肢  
不隨煩亂欲死雞矢白一升清酒五升搗篩合搗  
干遍乃飲大人服一升少小五合日二服 反胃  
吐食以烏骨雞一隻與水飲四五日勿與食將五  
蒲蛇二條竹刀切與食待雞下糞取陰乾爲末水  
丸粟米大每服一分桃仁湯下五七服卽愈 轉  
筋入腹其人背脚直其脈上下微弦用雞矢爲末  
水六合和方寸匕溫服 陰毒腹痛雞糞烏豆地  
膚子各一把亂髮一團同炒烟起傾入好酒一碗



浸之去滓熱服卽止。心腹鼈痕及宿癥并卒得  
 癥以飯飼白雄雞取糞同小便於瓦器中熬黃爲  
 末每服方寸匕溫酒服之日四五服或雜飯飼之  
 以消爲度亦佳。石淋疼痛雞矢白日中半乾炒  
 香爲末以酸漿飲服方寸匕日二當下石出耳  
 聾不聽雞矢白炒半升烏豆炒一升以無灰酒二  
 升乘熱投入服取汗耳如鼓鞞勿訝。以上諸方  
 所治皆是本莢木之氣而爲土致其用却由巽伏  
 於兌更得致木之用於土也。故取其腸胃之所轉  
 化而出者以療諸證爲切。且其獨取雄雞卽是可





明於氣化之義與風證對待蓋氣屬陽故取雄也

雞卵黃雞者為上鳥雞者次之氣味甘平無毒時珍曰卵

白象天其氣清其性微寒卵黃象地其氣渾其性

溫故卵白能清氣治伏熱卵黃能補血全卵則合

而有之附方治小兒疳痢肚脹用雞子一個

開孔入巴豆一粒輕粉一錢用紙五十重裹於飯

上蒸三度放冷去殼研入麝香少許糊和丸米粒

大食後溫湯下二丸至三丸癰疽發背初作及

經十日以上腫赤焮熱日夜疼痛百藥不效者用

煨雞子一枚新狗屎如雞子大攪勻微火熬令稀



稠得所捻作餅子於腫頭上貼之以帛包抹時時  
看視覺餅熱即易勿令轉動及歇氣經一宿定如  
日多者三日貼之一日一易至瘥乃止此方穢惡  
不可施之貴人一切諸方皆不能及但可備擇而  
已

雞子白 氣味甘微寒無毒 主治目熱赤痛除

心下伏熱止煩滿欬逆別錄又時珍主治和赤小豆

塗一切熱毒丹腫顛痛神效又經驗方主湯火燒  
灼雞子清和酒調洗勤洗生肌或生傅之亦可夏  
藏器主產後血閉不下取白一枚入醋一半攪服

又宗奭主產後血暈身痙直口目向上牽急不知人取雞子一枚去殼分清以荊芥末二錢調服  
安甚敏捷烏雞子尤良

愚按時珍云雞子白象天其氣清每用之以清氣其說亦本於前主治之證也然於藏器宗奭所主產後之證又覺清氣一語不足以槩其功且閱本草人參條後其所輯方此味同參用者殊不少如霍亂嘔吐人參二兩雞子白二枚也咳嗽上氣喘急而嗽吐血其脈無力者人參末三錢用雞子清調之又消渴引飲人參爲末雞子清調服一錢此



三證止二味同用也。其又反胃嘔吐，用人參雞子白外，加粟米薤白以煮粥食也。又胃寒氣喘不能傳化水穀者，人參為君，亦與雞子清同用，但加生附及生薑耳。更橫生倒產，用人參亦同於雞子清。止加乳香及丹砂研末，同生薑汁也。如時珍清氣之說，豈非因其清陽上浮，以為包舉濁陰之化育者，蓋得於出地之最先，而有微寒之氣乎。第如諸羽蟲之卵白，何以一無所取也。不原本於雞屬，與木而出地升天之氣化，與木受之最先者，漫謂其能清伏熱，不幾與他清熱之味例論而滾同用之。



其可乎哉。唯悉斯義，然後知雞子清之象天，舉清陽而上浮者，庶幾與人參之化濁陰而下濟也。乃可奏升降調氣之效。如諸證所治，若徒以清熱爲功，則就諸證所治之中，有橫生倒產一證，豈一清熱所能了。而奏效於斯須危急之際乎。先哲所云習而不察者，如此是其一斑矣。第清熱二字，本清陽上浮之火推之，如以茲味同於諸味之寒治熱者，漫無辨別，則亦猶是粗工耳。蓋前所治諸熱湯火等證，原非取其寒也。蓋取其陽之最清者以散熱，依稀乎從治之義也。如是，然後可以通於產後。

之治矣。附方 蚘蟲攻心口吐清水以雞子一

枚去黃納好漆入雞子殼中和合仰頭吞之蟲即

出也 咽塞鼻瘡及乾嘔頭痛食不下用雞子

枚開一竅去黃留白着米酢糠火頓沸取下更頓

如此三次乘熱飲之不過一二度即愈

卵黃 氣味甘溫無毒 附方 妊娠下痢絞痛

用烏雞子一枚開孔去白留黃入黃丹一錢在內

厚紙裹定泥固煨乾為末每服三錢米飲下 妊

娠胎漏血下不止血盡則子死用雞子黃十四枚

以好酒二升煮如飴服之未瘥再作以瘥為度

雞子黃

本草述

卷之三十一 禽部

七

還讀山房





去白留黃入酒中攪勻同煮可如飭也 鼠瘦已  
潰雞卵一枚米下蒸半日取黃熬令黑先拭瘡令  
乾以藥納孔中三度卽愈 頌曰雞子入藥最多  
而髮煎方特奇劉禹錫傳信方云亂髮雞子膏治  
孩子熱瘡用雞子五枚煮熟去白取黃亂髮如雞  
子大相和於鐵銚中炭火熬之初甚乾少頃卽髮  
焦乃有液出旋取置燒中以液盡爲度取塗瘡上  
卽以苦參末粉之頃在武陵生子蓐內便有熱瘡  
塗諸藥無益而日益劇蔓延半日晝夜號啼不乳  
不睡因閱本草髮髮條云合雞子黃煎之消爲水

療小兒驚熱下痢註云俗中嫗母爲小兒作雞子

煎用髮雜熬之良久得汁與小兒服去痰熱去百  
病又雞子條云療火瘡因是用之果如神效也  
愚按此食物也如希雍所云稟生化最初之氣誠  
然第諸禽中而雞得風木出地之始氣以爲生化  
如服之而佐使得當是亦養生之一助也但卵黃  
謂爲陰中之陰如時珍補血之說便當思其補而  
不滯者爲如何至合白用則又兼之微寒矣故服  
食貴於調和耳今產後類類頻用之不知產後氣  
血兩虛脾胃受傷其可恣食以爲快哉

雞

子黃

本草述

卷之三十一

禽部

七

靈寶山房

鴛

音木俗名鴨

家鴨為鴛野為鳧

肉 氣味甘冷微毒 時珍曰嫩者毒老者良

主治補虛除客熱和臟腑及水道 河間曰鴛之

利水因其氣相感而為使也 時珍曰鴨水禽也

治水利小便宜用青頭雄鴨取水木生發之象治

虛勞熱毒宜用烏骨白鴨取金水寒肅之象也

血 氣味鹹冷無毒 主治療中砒霜毒又卒中

惡死或先病痛或臥而忽絕並取雄鴨向死人口

斷其頭瀝血入口外以竹筒吹其下部極則易人

氣通即活也





愚按食物如鶩類取其能補第本草言其甘冷得無以冷補乎然觀治久虛咳血用之者大有佐使固非徒取其冷也至於療大腹水病則用之單行

又豈止以冷為功乎即劉河間以利水為氣相感

亦有未盡試即血之能解中毒中惡而思之則茲

物亦有能達其氣之塞而欲絕解其毒惡之結而

未散者為功也至於大腹水病豈非氣之欲塞戾

之欲結者乎夫血為水所化也可以通於茲義矣

雖然用雞血者取諸其陽用鴨血者取諸其陰大

槩不可易也 附方 白鳳膏葛可久云治久虛

本草 卷之三十一 禽部 白鳳膏葛可久云治久虛



發熱咳嗽吐痰咳血火乘金位者用黑嘴白鴨一  
隻取血入溫酒量飲使直入肺金以酒補之將鴨  
乾搗去毛脇下開竅去腸拭淨入大棗肉二升參  
苓平胃散末一升縛定用沙甕一個置鴨在內以  
炭火慢慢煨將陳酒一瓶作三次入之酒乾爲度取  
起食鴨及棗頻作取愈 大腹水病小便短少百  
一方用青頭雄鴨煮汁飲厚蓋取汗 又方用白  
鴨一隻治淨以豉半升同薑椒入鴨腹中縫定蒸  
熟食之

鶩

膽氣味苦寒無毒 主治解熱毒及痔瘡初起頻

塗抹之自消 時珍 附方 痔瘡有核白鷺膽一

枚取汁入熊膽二分片腦半分研勻瓷器密封勿

令泄氣用則手指塗之立效 冰珍膏善治痔瘡

冰片一分珍珠一分共研細末用鷺膽二個取汁

入盃內攪勻將雞毛搽敷患處 噎食病白鷺尾

毛燒灰米湯每服一錢

### 鴈

肪

音方鴈 脂也

氣味甘平無毒 主治風癩拘急偏

枯血氣不通利

本經

心鏡云上證用肪四兩煉淨





每日空心暖酒服一匙 又治熱結胸痞嘔吐

時珍曰外臺治此證有鴈肪湯 治耳聾和豆黃

作丸補勞瘵

愚按鴈有四德寒則自北而南止於衡陽熱則自南而北歸於鴈門其信也飛則有序而前鳴後和其禮也失偶不再配其節也夜則羣宿而一奴巡警晝則銜蘆以避繒繳其智也寇宗奭曰人不食鴈謂其知陰陽之升降少長之行序也道家謂之天厭亦一說耳食之則治諸風

鴈

萬畢術云蝦蟆得瓜化為鷓交州記云南海有鷓

魚九月變為鷓是鷓始以化成終以卵生故四時

常有之鷓與鷓兩物也形狀相似俱黑色但無

斑者為鷓今人總以鷓鷓名之

肉氣味甘平無毒 主治補五臟益中續氣實筋

骨耐寒暑消結熱和小豆生薑煮食止洩痢酥煎

食令人下焦肥嘉祐小兒患疳及下痢五色且且食

之有效寇宗奭時珍曰按董炳集驗方云魏秀才

妻病腹大如鼓四肢骨立不能貼席惟衣被懸臥

穀食不下者數日矣忽思鷓食如法進之遂暈劇



少頃雨汗莫能言但有更衣狀扶而圍小便突出  
白液凝如鷺脂如此數次下盡遂起此蓋中焦溼  
熱積久所致也詳本草鶉解熱結療小兒疳亦理  
固然也董氏所說如此時珍謹按鶉乃蛙化氣性  
相同蛙與蝦蟆皆解熱治疳利水消腫則鶉之消  
鼓脹蓋亦同功云

愚按鶉之用在本草謂其益中續氣消結熱療小  
兒疳痢又董炳集驗方亦云治中焦溼熱如魏秀  
才妻病鼓證食之輒愈者是也乃時珍云鶉爲蛙  
化而治療約畧相同是則此味所謂益中續氣者



母亦水土合德之微。雖食物之細而亦有合焉者。以爲中土之益有如是乎。若泛以通利水氣之用。視之。則又不得云旦旦食之矣。

白鴿 鴿惟白者入藥

肉 氣味鹹平無毒 主治解諸藥毒 希雍曰

凡毒藥之性多熱。鴿得金水之氣。故能解藥毒。而本草首及之。

卵 主治解瘡毒痘毒 附方 預解痘毒小兒

食之永不出痘。或出亦稀。用白鴿卵一對。入竹筒封置。廁中半月。取出。以卵白和辰砂三錢。丸綠豆。

本草述 卷之三十一 禽部 七 還賣山房



大每服三十丸三次飲下毒從大小便出也

屎

名左盤龍

時珍曰野鴿者尤良其屎皆左盤故宜

明方謂之左盤龍也 氣味辛溫無毒 附方

破傷中風病傳入裏用左盤龍即野鴿糞江鰈白

殭蠶各炒半錢雄黃一錢為末蒸餅丸梧子大每

服十五凡溫酒下取效 陰證腹痛面青甚者鴿

子糞一合炒研末極熱酒一鍾和勻澄清頓服即

愈 反花 毒初生惡肉如米粒破之血出肉隨

生反出於外用鴿糞三兩炒黃為末溫湯水洗

後傳之



愚按鵠肉鹹平而其糞又得辛溫方書多用之治  
破傷風其治乃風之入裏者也是其所鬱之風已  
化熱而傷陰非可以表散所謂宜下之證也唯是  
物為鹹平之辛溫轉化而出者從陰中化陽可以  
導其邪而出之故能幾其奏功也歟用是物每同  
江鱧蓋鱧出水中是亦陰中之陽也

雀

卵氣味酸溫無毒 主治下氣男子陰痿不起

強之令熱多精有子 別錄 女子帶下便溺不利除疝

瘕 孟詵 希雍曰雀屬陽氣溫味酸其性特淫故煖





腎而強陰肉氣味甘溫功不及卵 附方 雀卵

丸兔絲子末一斤於春二三月取麻禾雀卵五百

個去黃用白和丸梧子大每八十九丸空心鹽湯或

酒下腰痛加杜仲四分之一下元冷加附子六分

之一此藥當預製成末遇有雀卵不拘多少而用

雄雀尿 一名白丁香 氣味苦溫微毒 和首生男子

乳點目中弩肉赤脈貫童子者即消神效和蜜丸

服治癥瘕久痼諸病癰癩不潰者點塗即潰 方

書主治水腫癘風癰滯下

愚按雀卵之用在腎中陰不配陽者固在所忌第



如老人臟腑虛損陽氣之弱先哲用爲壯陽益氣  
之助見於食治是則應節而投亦何可少也且求  
嗣者云精清薄主雀卵丸是則氣化生精固人身  
生育之本也本草所謂強之令熱多精有子者豈  
屬妄哉第酸溫之味多矣惟其性之淫者是陽氣  
之有餘於是烏足徵而益腎有專功也至於雀糞  
又陽氣所轉化而出如方書用治水腫癘風癩證  
滯下又豈非人身之真陽其氣化虛乏以爲疾肯  
如四證者應爲茲物所對待而逐隊於諸味中以  
奏功者歟

希雍曰雀肉及卵陰虛火盛者忌之女子帶下溺  
不利屬腎虛有火者並忌之凡服木者忌之雀矢  
療目痛非風熱外邪者不宜用古方同天雄服此  
藥性極熱有大毒非陰臟及真陽虛憊者慎勿輕

餌

修治雷公曰凡使勿用雀兒糞雀兒口黃未經  
淫者也其雀蘇底坐尖在上是雄兩頭圓者是雌  
陰人使雄陽人使雌臘月采得去兩畔附着者鉢

中研細以甘草水浸一夜去水焙乾用麻雀糞收  
來用漆桌

一張將水把桌子打溼用溼袂畧振去水留些水  
氣在上却將雀糞滿桌鋪開以篋頭展轉抄之其





白粉俱粘於桌上將黑糞抹去放桌  
於日中曬乾用鷺翎掃下白糞用

巧婦鳥 又名鷓鴣 俗名黃脰雀

時珍曰鷓鴣處處有之生蒿木之間居藩籬之

狀似黃雀而小灰色有斑聲如吹噓喙如利錐取

茅葦毛毳 音翠獸毛 將細者 為窠大如雞卵而繫之以麻

髮至為精密懸於樹上或一房二房故曰巢林不

過一枝

窠 主治膈氣噎疾以一枝燒灰酒服或一服三

錢神驗

伏翼 又名蝙蝠

本草述 卷之三十 禽部



氣味鹹平無毒 時珍曰蝙蝠性能瀉人故陳子

真等服之皆致死觀後治金瘡方皆致下利其毒

可知卽以之入藥亦當慎之 附方 丹溪方浴

癩證用大蝙蝠一個以硃砂三錢填入腹內以新

瓦盛火炙令酥爲度候冷爲末每一個分作四服

氣弱及幼年分五服空心白湯下此藥慄悍勿輕

用 集要方治多年瘰癧不愈神效方用蝙蝠一

個貓頭一個俱撒上黑豆燒至骨化爲末摻之乾

卽油調傅內服連翹湯

夜明砂 卽天鼠矢惡  
白斂白微

氣味辛寒無毒 主治腹



中血氣破寒熱積聚除驚悸治疳有效治目盲障  
翳明目炒服治瘰癧 希雍曰天鼠夜出喜食蚊  
蚋故其屎中淘出細砂皆未化蚊蚋眼也所以  
人主明目治目盲障翳取其氣類相從也

愚按此種用之治目盲障翳是固如希雍所云以  
氣類相從也唯是療小兒疳證方論中云以下胎  
毒若然則本經謂其治腹中血氣破寒熱積聚固  
有與疳證關切者矣第行腹中血氣破其寒熱積  
聚何以獨取茲物也蓋茲物之命名原有分曉蚊  
蚋之遇夜而出者其眼固夜明也明於夜而入於

蝙蝠

夜明

本草

卷之三十

禽部

三

重刊





天鼠之腹仍不消化是則有遇陰腎而能破除由  
血化而致氣化初不爲血氣之陰邪所轉者此先  
聖察物之精俾其應證而投有如斯也 附方  
青盲不見夜明砂糯米炒黃一兩柏葉炙一兩爲  
末牛膽汁和丸梧子大每夜臥時竹葉湯下二十  
丸至五更米飲下二十九瘡乃止 一切疔毒夜  
明砂五錢入瓦瓶內以精豬肉三兩薄切入瓶內  
水煮熟了先以肉與兒食飲其汁取下腹中胎毒  
次用生薑四兩和皮切炒同黃連末一兩糊丸黍  
米大米飲服日三次

修治 時珍曰凡采得以水淘去灰土惡氣取細

砂曬乾焙用其砂乃蚊蚋眼也

鵜鷓 俗名淘鷓

油氣味鹹溫滑無毒 主治塗癰腫治風痺透

經絡通耳聾 時珍曰淘鷓油性走能引諸藥

透入病所拔毒故能治聾痺腫毒諸病 又曰剝

取其油熬化掠取就以其嚔盛之則不滲漏他物

即透走也 附方 耳聾用淘鷓油半匙磁石一

小豆腐香少許和勻以綿裏成挺子塞耳中口含

生鐵少許用三五次即有效



寒號蟲

五靈脂

覈曰五靈脂寒號蟲所遺也寒冬號呼

因名寒號說文云有足之謂蟲裸毛羽鱗介之總

稱故曰五靈脂則以形舉也一名鷓鴣生北地極

寒處五臺山中最多狀似小雞肉翅四足夏月毛

羽五采自鳴曰鳳凰不如我初冬毛羽脫落裸形

如雛忍寒而號夜鳴曰來朝造個窠旦鳴曰得過

且過日出暖和月令云仲冬鷓鴣不鳴夜不號矣

故寒號而陰剝號息而陽復夜號以待日出之爲

旦也餐以柏實先冬噙集穴居南向餐已而遺遺





已而餐轉展化道形若凝脂氣甚臊惡

氣味甘溫無毒 惡人參損人 諸本草主

利氣脈治男女一切心腹臍肋少腹諸痛身

痺刺痛疝痛及血痢腸風腹痛血凝齒痛並肝

發寒熱反胃消渴痰涎成窠血貫瞳子治女子血

閉並經水過多赤帶不絕療胎前產後血氣諸痛

及小兒五疳潮熱又主損傷接骨殺蟲 方書主

治行痺心痛胃脘痛脹滿中風中暑氣痰飲痛痺

痿厥消癰泄瀉滯下疝痔齒此以用之多少爲先

後 盧復曰陽出陰入夏長冬藏寒號毛羽似之



冬既無表旋歸於內，驟不能飛，用遺作食出入數  
數實彼脂膏。時珍曰：五靈脂足厥陰肝經藥也。  
氣味俱厚，陰中之陰，故入血分。肝主血，諸痛皆痛  
於木，諸蟲皆生於風，故此藥能治血病、散血和血。  
而止諸痛，其所治證多屬肝經也。失笑散不獨治  
婦人心痛、血痛，凡男女老幼一切心腹脇肋少腹  
痛、疝氣、并胎前產後血氣作痛及血崩、經溢百藥  
不效者，俱能奏功。屢用屢驗，真近世神方也。又按  
李仲南云：五靈脂治崩中，非止治血之藥，乃去風  
之劑，風動物也。衝任經虛被風傷，襲營血以致崩。



中暴下與荆芥防風治崩義同方悟古人識見深  
奧如此此亦一說但未及肝血虛滯亦自生風之  
意 中粹曰濁陰有歸下之功兼能降火人所未  
知 丹溪曰凡血崩過多者半炒半生酒服能行  
血止血治血氣刺痛甚效 熟者行生者止欲一  
行一止須半生半熟相合用之 希雍曰寒號蟲

畏寒喜暖故其糞亦溫味甘而無毒氣味俱厚陰  
中之陰降也入足厥陰手少陰經專治血分之病  
凡心胸血氣刺痛女子經病產後少腹兒枕塊諸  
痛及痰挾血成窠囊血凝齒痛諸證所必須之藥



同澤蘭牛膝益母草延胡索牡丹皮紅花赤芍  
藥山查生地黃治產後惡露不盡腹中作疼加桃  
仁其效更速勿過劑 同番降香紅麴川通草紅  
花延胡索韭菜童便治胃脘瘀血作痛 同木香  
烏藥治周身血氣刺痛 附方 失笑散治男女

老少心痛腹痛少腹痛小腸疝氣諸藥不效者能  
止能行婦人妊娠心痛及產後心痛少腹痛血氣  
痛尤妙用五靈脂蒲黃等分研末先以醋二盃調  
末熬成膏入水一盞煎至七分連藥熱服未止再  
服一方以酒代醋一方以醋糊和丸童便酒服

靈脂散治丈夫脾積氣痛婦人血崩諸痛飛過五  
靈脂炒烟盡研末每服一錢温酒調下此藥氣  
難喫燒存性乃妙也或以酒水童便煎服名掛  
散治產後心腹脇肋腰膀痛能散惡血如心煩口  
渴者加炒蒲黃減半霹靂酒下腸風下血者煎烏  
梅柏葉湯下中風麻痺痛者加草烏半錢同童便  
水酒煎服

愚按凡物皆稟陰陽卽如禽類未有如寒號鳥至  
冬而毛羽脫落夏月則毛羽五采乘乎陰陽出入  
之氣如其迥殊者也乃用之者獨取其遺而且



謂之曰脂也。何哉。盧復曰。用遺作食。出入數數。實彼脂膏。斯言近之矣。夫乘乎陰陽。出入之氣者。徹於表裏。既如是其不爽。而腸胃所食所化之物。又復出入數數。竟以臭腐爲神奇。則本草所謂能通利氣脈。而丹溪云。於血能行能止。豈不然歟。寧非互爲發明者歟。蓋其能行且能止者。由於出入陰陽。以還歸腸胃之轉展。化道而能令氣脈通利。非以行止爲事者也。雖然。世知用之治血耳。如時珍主治肝瘡寒熱反胃消渴。及痰涎挾血成窠等證。不幾以爲無當乎。詎知病於血者。寧獨內溢外溢。





乃始爲病乎。楊仁齋曰：人之一身，不離乎氣血。凡病經多日，療治不痊，須當爲之調血。血之外證，咳、嘔、燥、渴、昏、憤、迷、忘、常、喜、湯、水、嗽、口、不、問、男、女、老、幼，固以調氣爲上，調血次之。第如血有滯泥於諸經者，則氣之道路未免有所壅遏，又當審所先而導之化之。經所謂先去其血而後調之，不然氣終不得調也。推仁齋此義，則凡六淫七情等證，宜無不研治到此矣。抑愚更有說焉。夫五靈脂之用，多以其功強半在血，而不知開竅、本草、通利、氣脈一語，大爲中的。蓋氣爲血之先，血不能爲氣之帥也。



第當釋氣脈二字氣不離於脈而言是所謂陰氣  
陰氣卽血中之氣也試以方書主治比味於行痺  
較多在東垣註行痺云身體沉重走注疼痛溼熱  
相搏而風熱鬱不得伸附着於有形也方書之所  
著六方亦多言風非風不能走注也風臟固卽血  
臟然不有血中之氣能調風以和血而幾其血之  
與風能並育而不相害乎哉然則李仲南所云五  
靈脂治崩中非止治血之藥乃去風之劑云云義  
同斯言其先得我心乎何以明其爲能調風蓋其  
所遺者固屬陰也乃此禽用遺作食出入數數展

轉化導則其化導之氣有陰化於陽陽化於陰者此風之所以能調而血之所以能和者也蓋風調而後氣平氣平而後血和非謂其不入血分第其爲和血之先導不可謂其直入血中與疏壅快滯之血藥一例奏功也且斯藥治療多證試取而較其主治豈盡屬治血病哉則可以思其不治血病而實爲和血之主者有血中之氣可以通營衛而滑經絡也明者若更精研及此乃得善用此藥矣若茲藥有誤以爲通利者試觀方書中療女子產後喘急痰與血雜涌而上用失笑散似乎用之以



爲通利。不知主以六君而合此味爲之化陰導陽。正所以妙於補也。卽如竹籠散之治下消，止於靈脂黑豆二味，是豈通利之劑能愈腎消證乎。熟思其功而其義自明。附方 產後血暈不知人事

用五靈脂二兩半生半炒爲末，每服一錢，白水調下。如口噤者，音挖開灌之，入喉卽愈。產後腹痛

用五靈脂末、神麴糊丸、白朮、陳皮湯下。血崩不

止，用五靈脂十兩研末，水五盞煎三盞，去滓澄清

再煎爲膏，入神麴末二兩和丸，梧子大，每服二十

丸，空心溫酒下，梗止極效。胎衣不下惡血冲心

用五靈脂半生半炒研末每服二錢溫酒下

吐

血嘔血治血妄行入胃吐不止五靈脂一兩黃

半兩為末新汲水服二錢 中風癱緩追魂散

五靈脂研末以水飛去上面黑濁下面砂石研末

每服二錢熱酒調下日一服細服小續命湯 風

冷氣血閉手足身體疼痛合麻五靈脂二兩沒藥

一兩乳香半兩川烏頭一兩半炮去皮為末滴水

丸如彈子大每用一九生薑溫酒磨服 五疳潮

熱肚脹髮焦不可用大黃黃芩損傷胃氣恐生別

證五靈脂水飛一兩胡黃連半兩為末雄豬膽汁



九黍米大每服一二十丸米飲下 痰血凝結紫

芝丸用五靈脂水飛半夏湯泡等分爲末薑汁浸

蒸餅丸梧子大每飲下三十丸 按五靈脂能殺

蟲一醫按治蛔厥者云蟲不盡用靈脂而全愈蓋

蟲雖成於溼熱然生於風木特木從土化耳張子

和之言是也溼熱則氣凝血滯而風木乃從溼土

以化靈脂之通氣脈而行血絡此所以除風膏能

殺蟲也

希雍曰凡瘀血停滯作痛產後血暈惡血衝心少

腹兒枕痛留血經閉瘀血心胃間作痛血滯經脈





氣不得行攻刺疼痛等證在所必用然而血虛腹

痛血虛經閉產婦去血過多發暈心虛有火作痛

病屬血虛無瘀滯者皆所當忌

希雍首言此於破血行血

之為被掩拙後又言無瘀滯者不可用殊不知此種非行滯之劑也

修治 色黑如鐵凡用以饒心潤澤者為真其未

化者不堪入藥 茲物多夾沙石絕難修治用酒

研仍用酒飛去沙石曬乾收用 生用者酒研飛

煉去沙石熟用者飛後炒令烟起另研

前哲言過用則飽脹

傷胃非止為製不淨也觀失笑散之主以六君其義可參矣

本草述卷之三十終

